

讀 禮 志 疑



11816

讀

禮

志

疑

陸隨其輯

中華書局影印

叢書集成初編

讀禮志疑

中華書局

出版發行

(北京王府井大街三十六號)

秦皇島市資料印刷廠印刷

一九八五年北京新一版

開本：七八七乘一〇九二毫米 三十二分之一  
統一書號：一七〇一八·一五一

讀禮志疑

叢書集成初編所選學海類編及正誼堂全書皆收有此書學海本十二卷正誼本六卷條數互有多寡然學海本多按語故據學海本排印並附正誼本所多五十條及張伯行序於後

# 讀禮志疑卷一

清 喬湖陸隨其稼書輯

欲考古禮須先知古人宮室之制。古人言宮室堂上名目尤多。賈公彥士喪禮疏曰：堂上行事非專一所。若近戶卽言戶東戶西。若近房卽言房外之東房外之西。若近楹卽言東楹西楹。若近序卽言東序下西序下。若近階卽言東階西階。若自半以南無所繼屬者卽以堂言之。浙米于堂是也。其實戶外房外皆是堂。此一條最明。

又按特性記有東堂北堂。鄭注東堂東夾之前近南。北堂中房而北則又是房中之分名。

爾雅云：室有東西廂曰廟。無東西廂有室曰寢。又云：東西牆謂之序。邢疏云：此謂室前堂上東廂西廂之牆也。愚按曰：廂曰序通在堂上。自其近牆者言則曰序。自檻至牆一閒統言之則曰廂。今人指堂下廊廡爲廂。非爾雅所謂廂。

爾雅又云：無室曰榭。邢疏云：榭有二義。一者臺上構木曰榭。月令可以處臺榭是也。一則無室者名榭。其制如今廳事。春秋成周宣榭火是也。郭注：榭卽今堂壇者。堂壇卽今殿也。殿亦無室故云卽今堂壇。愚按觀此可知堂與廳之別。家禮所謂遂遷于廳事。

陳祥道禮書云：鄭康成釋儀禮謂房當夾室北是也。孔安國謂西房西夾室東房東夾室誤矣。又言大夫

士之房室與天子諸侯同。鄭氏謂大夫士無西房誤矣。房皆南戶。愚按夾室非房。大夫士無西房皆當以康成之說爲正。楊氏儀禮圖亦無西房。

喪服傳既練舍外寢。鄭注舍外寢于中門之外屋下。壘塈爲之不塈。所謂壘室也。賈疏云。練後不居舊廬。還于廬處爲屋。但天子五門。諸侯三門。得有中門。大夫士惟有大門。內門兩門而已。無中門。而云中門外者。按士喪禮及既夕外位惟在寢門外。其東壁有廬壘室。若然則以門爲中門據内外皆有哭位。其門在外內位中。故爲中門。非謂在外門內門之中爲中門也。愚按家禮各歸喪次條下云。中門內外而不詳中門爲何門。必看賈疏乃明。內則闔寺守之。鄭注云。闔寺守中門之禁。與此中門似不同。

喪禮于襲大小斂獻明器及遣奠之豆籩俎皆言縝不縝。注云。縝讀若絰屈也。江沔之間謂縗收繩索爲絰。愚按凡所陳之物少一行可陳訖者。則只須言南上北上。不須言縝不縝。若物多一行陳不盡。須兩行三行者。則必言縝不縝。假如南上之物。第一行從南至北。第二行仍自南至北。則謂之不縝。若第一行從南至北。第二行取便。卽從北至南。則是縝。縗收繩索之喻至切。

注疏亦多疏略。如旣夕篇。窆及反哭。皆云拾踊三拾更也。投壺則拾。投哭踊則拾。更爲之也。注疏止云拾更也。而不詳其義。又不注于窆。而注于反哭。前後倒置。如雍正、雍府不註于特性。而註于少牢。亦然。禮有讀贈一節。注謂榮其多。愚謂不然。是欲人知其中無他物。不過是用器役器之類。此是古人防患之意。

賈公彥疏有極繁冗處如朝一溢米夕一溢米去五分一以爲帶喪服士喪禮兩篇俱有旣無二義止註其一處足矣卻兩處各累數百言孔氏郊特牲疏謂鄭注此旣破補爲禰故于祭統春禘秋嘗不復更破其詳略之法與賈氏異矣又玉藻疏云其六冕玉飾上下貴賤之殊竝已具王制疏于此略而不言旣夕篇記云疾者齊養者皆齊鄭注曰正情性也最精人于疾病之際必正其情性然後可生可死人子當父母之疾病亦必正其情性然後可以致親之生可以送親之死

賈公彥周禮儀禮二疏有功學者唐書不爲立傳止附見于其師張士衡傳中其生平及字俱不可考可惜但載其子大隱以直諫著于武后之世又載其傳業趙人李元植元植該覽百家高宗時數召見以帝闇弱頗箴切其短帝禮之不寤遷巴令可想見公彥之教

孔賈之解禮惟康成是從不敢絲毫有違雖其守家法不免有太過之處然猶不失爲謹慎愚讀唐書啖叔佐傳贊曰左氏與孔子同時以魯史附春秋作傳而公羊高穀梁赤皆出于夏門人三家言經各有舛然猶悉本之聖人其得與失蓋十五義或謬誤先儒畏聖人不敢輒改也啖助在唐名治春秋摭詭三家不本所承自因名學愚私臆決尊之曰孔子意也趙匡陸質·疑即淳從而唱之遂顯于時孔子沒乃數千年助所推著果其意乎徒令後生穿鑿詭辨詬前人舍成說而紛紛助所階矣嗚呼孔賈之信康成不猶愈于啖叔佐之自信乎

士喪禮上下二篇止有主人拜賓之文而于柩于重于奠皆未嘗拜至士虞禮設饌後始言主人再拜稽

首自虞以前。豈經文略而不言歟。抑主哀不主敬。而不拜歟。賓之弔奠贈贈。亦皆不嘗拜。奠于祭祀者也。則所謂奠者。止是致其可奠之物。而非如家禮所謂奠。

士虞禮記言升左肩、臂、臍、肫、骼、脊、脅。凡七體。經文于獻尸之時。止言舉脊、舉幹、舉骼、舉肩。疏謂尙有臂、臍、肫、三體不舉。是君子不竭人歡、不盡人忠之意。其解精矣。又引特牲注云。欲改饌于西北隅。故遺之。雖義得兩施。然竭歡盡忠之解。所以示人者深矣。

牲體之數。陳祥道禮書曰。前脰骨三。肩、臂、臍<sub>音</sub>也。後脰骨三。肫<sub>音亦作脰</sub>、骼<sub>音亦作骼</sub>也。脊骨三。正脊、臍脊、橫脊也。脅骨三代。脅、長脅<sub>亦曰</sub>短脅也。正脊之前。則臍也。亦謂之脰。肫之上。則髀也。然則左右肱之肩臂。臍與左右股之肫骼。而爲十有二。脊骨三。與左右脅骨六。而爲九。正祭不獻神尸。主人之俎。兩髀不升于主人。主婦之俎。臍不升吉祭之俎。則祭之。所用者去脾臍而二十有一。去二殼而爲十九矣。士喪禮。特豚四。鴟去蹄兩脰也。脊肺既夕。鼎實羊左肺。豕亦如之。然則四鴟者。殊左右肩髀而爲四。又兩脰一脊而爲七。此所爲豚解也。士喪禮略。豚解而已。至虞然後豚解。體解兼有焉。若夫正祭。則天子諸侯有體解。豚解。大夫士有體解。無豚解。以其無朝踐獻腥之禮故也。此一條最明。但又曰國語福郊之事。則有全脊。王公立飫有房脊。親戚燕饗有散脊。則全脊豚解也。房脊體解也。散脊骨折也。<sub>此更當同夏官</sub>小子職參看。此一條方氏古今考。深以爲非。曰孔穎達左傳疏。全其牲體而升于俎。謂之全脊。豈祥道豚解七體乎。半解牲體而升

于俎謂之房齊祥道謂體解二十一體可乎。體解節折而升于俎爲折俎爲殺齊祥道何故以折俎解房齊而不解殺齊乎。其誤也。根于康成。禮記夏官小子職一則愚按豚解非全齊當以方氏之說爲是。康成注禮運云腥其俎謂豚解而腥之。熟其殺謂體解而爛之。雖亦引國語全齊房齊爲證然賈公彥儀禮小斂疏云禘郊先有全齊後有豚解體解是康成亦非以豚解爲全齊但說得未明致陳氏之誤耳。查禮運鄭注亦未嘗引國語引國語者賈疏也。

茅之于祭有二用。鄭康成周禮注云茅以共祭之苴亦以縮酒最明。共祭之苴則鄉師所謂茅蘿及易之藉用白茅。士虞禮之苴羽茅皆是也。亦以縮酒則甸師所謂蕕茅及左傳之包茅不入皆是也。若禹貢之包匱菁茅則似兼此二者之用。

士虞禮祝聲三啓戶泣云將啓戶驚覺神也。疏引曲禮將上堂聲必揚爲例可想見祭祀古人必曲盡鬼神之情。

朱子語類云魯共王壞孔子宅得古文儀禮五十六篇。禮記奔喪篇疏作五十七篇其中十七篇與高堂生所傳十七篇同。鄭康成注此十七篇多舉古文作某。則是他當時亦見此壁中之書不知如何只解此十七篇而三十九篇不解竟無傳焉。愚按焦弱侯經籍志云永樂中御史沅州劉有年獻儀禮逸經十有八篇時未加表章旋就湮沒夫程朱大儒所未見者有年何從而得之此非僞書則必纂輯諸經之文而成之如吳草廬儀禮逸經之類焦氏信爲古經出千百世之後則愚矣。

語類曰儀禮不是古人預作一書如此初閒只以義起漸漸相襲行得好只管巧至于情文極細密聖人見此意思好故錄成書又引陳振叔之說曰此乃是儀更須有禮書儀禮只載行禮之威儀所謂威儀三千是也禮書如云天子七廟諸侯五大夫三士二之類是說大經處這是禮須自有箇文字此二條讀儀禮者皆不可不知。

朱子謂儀禮疏說得不甚分明愚按如豚解體解與全脊房脊異同之處是亦不分明之一端也又如朱子疑總十五升抽其半然小功十二升則其縷反多于總矣又不知是如何疏亦不見分明又如朝溢一米賈疏最煩然古科有二法律歷志與左傳不同處孔氏喪大記疏言之甚明而賈疏卻不及語類有一條問溫公儀首經綴于冠而儀禮疏說別材而不相綴朱子曰綴也得不綴也得無緊要愚按冠經本別材而不嫌其綴猶衣裳本殊製而深衣不嫌于連也禮有可通融者此類是矣文集卷六十三胡伯量云三禮圖經之四旁綴短繩四條以繫于武此與溫公說不同。

士虞禮疏據二十八月後吉祭而言禪祭以前總爲喪祭若喪中自相對則虞爲喪祭卒哭爲吉祭愚因偶看大學思慎獨誠意之分以意對心則意是動之端以獨對意則獨又是意動之端與此一例也喪大記小斂主人袒說髦括髮以麻婦人髽帶麻于房中鄭注云婦人之髽帶麻于房中則西房也天子諸侯有左右房孔疏云于房中者謂男子說髦括髮在東房婦人髽帶麻于西房也士喪禮主人括髮袒衆主八坐之房婦人髽于室以男子在房故婦人髽于室大夫士惟有東房故也愚按大夫士無西房陳

氏禮書不欲從康成之說以此處證之則知康成之說不可易矣陳氏集說及大全于此處竝未分別東房西房殊爲疏略

注疏中有截法有補法補法有二如本文所無而他處所有則移而補之如士喪禮言浴用巾而不言沃水之器則引喪大記補之曰沃水用料既夕言主人入袒乃載而不言納車時節則取記文補之曰賓出遂匠納車于階閒又如喪服言曾祖父母而不言高祖則取總麻章補之曰族祖父者高祖之孫則高祖有服明矣有本文所無而他處亦無則推而補之如士庚禮言蓬棗蒸栗擇注便推之曰棗蒸栗擇則菹刑也棗蒸栗擇則豆不揭蓬有藤也士喪禮言復者降自後西榮注因喪大記有匱人取所徹廟之西北屏薪用爨之一句便于此推之曰降因徹西北屏若云此室凶不可居然也有此補法然後不覺經文之疏略截法則如喪服解同居繼父及同在他邦兄弟及婦人何以不杖之婦人喪禮君使人弔之人及旣夕旣窆而退之賓祭統所謂祭之日一獻郊特牲所謂古者生無爵皆是有此截法然後不覺經文之寬泛又有據彼決此法如士喪禮言主人入坐于牀東衆主人直言在其後不言坐喪大記則云士之喪主人父兄子姪皆坐于東方注云此據命士彼據不命之士雜記前云期之喪練則弔後云期之喪未葬弔于鄉入哭而退注以後之期爲姑姊妹無主者有此然後不覺經文之互異又如考工記云知者創物疏凡知聖有若云德之知仁聖義之知聖則據賢人以下此言知聖則濬哲文明之等也

喪大記士之喪二日而殯此承上文大夫來蓋士之禮死與往日生與來日大夫以上皆以來日數故在

士爲三日而殯者，在大夫視之，則止是二日也。陳氏集說及大全皆略不言。曲禮內陳氏亦不言死與往日是士禮。

喪大記君設大盤一節舊本在始死遷尸于牀之前孔疏雖云宜承濡灌乘于坎下札爛脫在此耳而仍不易其舊古人疑則傳疑之意也陳氏竟易置之而又不注明其舊次則近武斷矣如雜記之內子以鞠衣及練則弔皆然。

士虞禮及閒傳中月而禫喪服小記補必以其昭穆亡則中一玉藻士中武以上三中字注作閒字解曲禮上生與來日死與往日二與字注作數字解他處皆所少朱子雖云漢儒說禮制有不合者皆推之以爲商禮此便是沒理會處然亦確有是夏商之禮不可牽合者須平心以審之。

士喪禮言小斂之絞廣終幅析其末而不言大斂之絞廣狹如何喪大記言大斂之絞一幅爲三不辟而不言小斂之絞廣狹如何注疏皆合兩處來解是補經之法袁了凡羣書備考言注儀禮者鄭玄爲之疏者賈逵也以賈公彥爲賈逵疏謬如此豈不誤人。

喪大記大夫之喪將大斂君卽位于序端又大夫士旣殯而君往焉君卽位于阼疏云大斂時禮未成辟執事故卽位于序端旣殯而君往禮已成故卽位于阼階又未大斂之前君雖來主婦猶在戶西而大夫君條則云婦人卽位房中疏云大斂哀深故不辟君旣殯後哀殺故辟也此等處集說皆絕不分曉。

士喪禮君視大斂祝負墉南面鄭注云視南面房戶東鄉君喪大記亦有負墉南面之文鄭注亦以爲在

房戶東乃儀禮刊本將房戶誤作房中楊氏圖因之遂列祝于房中不知君將祝視而踊若在房中則遠于君矣安能視之而踊此以禮記注證之可見况房無北壁見于朱子答趙子欽書安得房中有墉喪大記鄭注云飾棺者以華道路及墉中不欲衆惡其親也此解最精知此則知龍幃黼翫振容魚躍一切文物皆非得已也此與濡濯棄于坎同一用心集說于此略而不言者非



## 讀禮志疑卷二

月令孔疏引太史職鄭注云中數曰歲。朔數曰年。中數者謂十二月中氣一周總三百六十五日四分之一謂之一歲。朔數者十二月之朔一周謂三百五十四日謂之爲年。此是歲年相對故有朔數中數之別。若散而言之歲亦年也。故爾雅釋文云唐虞曰載夏曰歲商曰祀周曰年是也。又玉藻上大夫曰下臣擯者曰寡君之老疏云在客曰介當云介而云擯者擯介散文則道也。又康成大宗伯注曰出接賓曰擯入詔禮曰相疏云此對文義耳通而言之出入皆稱擯也。又大司樂奏黃鐘歌大呂疏云據出聲而言曰奏據合曲而言曰歌其實歌奏通也。

鄭康成旣夕注云牆有布帷柳有布荒喪大記注又云在旁曰帷在上曰荒皆所以衣柳也。則帷荒總名爲柳。賈公彥疏云對而言之則帷爲牆象宮室有牆壁荒爲柳以其荒有黼黻及齊三采諸色所聚故得柳名。聚也柳之言總而言之皆得爲牆巾冕乃牆及檀弓云周人牆置冕皆牆中兼有柳縫人衣製柳之材柳中兼牆愚按經文用字有此對言總言之二法不可不知注疏亦謂之對文散文。又程大昌作袒免辨謂解除吉冠是之謂免免之爲言正。是免冠之免不應別立一冠名之爲免而讀之如問也古今言以布繞頂及鬚而謂之爲免者惟鄭氏一人愚按賈氏喪服疏孔氏喪服小記疏言括髮免髽之制詳矣程氏欲舉而盡廢之不免武斷況喪服小記明言斬衰括髮以麻免而以布問喪明言不冠者之所服也則免

非徒免冠可知。惟服問云。凡見人無免經。則當如免冠之免。

學者不知對言總言之分。而拘牽于文字者多矣。又如太史注曰。典則亦法也。疏云。太宰注典則法所用異。異其名也。其實典則與法一也。大行又以大賓爲諸侯。大客爲孤卿。疏云。賓客相對則別。散文則通曲禮。效犬者左牽之。疏云。通而言之。狗犬通名。若分而言之。則大者爲犬。小者爲狗。又周禮疏曰。五齊對三酒。酒與齊異。通而言之。五齊亦曰酒。又如封人疏云。有足曰蟲。無足曰豸。

喪服小記言王者。禘其祖之所自出。以其祖配之。孔疏依鄭氏。以禘爲郊天。以祖之所自出爲先祖所從出之天。若周之先祖出自靈威仰也。鄭學之疵。此爲最甚。其詳見大傳注云。王者之先祖皆感太微五帝之精以生。蒼則靈威仰。赤則赤熛怒。黃則含樞紐。白則白招拒。黑則汁叶作光紀。皆用正歲之正月郊祭之。疏云。靈威仰至汁光紀。春秋緯文耀鉤文。又元命包云。夏白帝之子。殷黑帝之子。周蒼帝之子。又郊特牲疏。以北極耀魄寶并五帝爲六天。又引孝經宗祀文王于明堂以配上帝。謂指五帝。皆荒誕不經。喪服小記云。爲殤後者。以其服服之。鄭注云。言爲後者據承之也。殤無爲人父之道。以本親之服服之。疏云。此論宗子殤死。族人不得以父道爲後之事。集說謂以其服服之者。子爲父之服也。鄭孔之說爲長。中庸言周公追王。太王王季。大傳言武王克商。卽追王。太王王季文王。大傳之追王。是加以王號。中庸之追王。是備其王禮。孔疏云。中庸追王。是以王禮改葬。則恐未必然。

大傳言庶姓別于上。而戚單于下。又言繫之以姓。而弗別。鄭注云。姓正姓也。始祖爲正姓。高祖爲庶姓。孔

疏云始祖爲正姓者若炎帝姓姜黃帝姓姬高祖爲庶姓者若魯之三桓鄭之七穆集說曰姓爲正姓氏爲庶姓愚按姓氏二字分而言之則姓自姓氏自氏總而言之又皆可謂之姓

大傳有小宗而無大宗者有大宗而無小宗者鄭注孔疏及陳氏集說皆就國君之子言大全載程子一條則就別子之子言程子之說恐非定論

大傳一條云自仁率親等而上之至于祖名曰輕自義率祖順而下之至于禰名曰重一輕一重其義然也一條云自仁率親等而上之至于祖自義率祖順而下之至于禰是故人道親親也愚按祖以義爲主故義屬祖禰以仁爲主故仁屬禰非謂事禰止用仁不用義事祖止用義不用仁也仁義之分配祖禰猶之分配事親從兄親親敬長也觀兩條之末一則曰其義然也一則曰人道親親也則祖禰二者又皆可謂之義亦皆可謂之仁此仁義二字之錯綜交互者也又性理朱子有一條云以其性而言之則皆體也以其情而言之則皆用也以陰陽言之則義體而仁用也以存心制事言之則仁體而義用也此又仁義體用之錯綜交互者也

服問云母出則爲繼母之黨服母死則爲其母之黨服爲其母之黨服則不爲繼母之黨服鄭注云雖外親亦無二統孔疏不詳臨川吳氏曰母死謂已母死而父再娶雖有繼母而子仍服死母之黨詳其文義自合如此陳氏集說乃云母死謂繼母死也其母謂出母也殊謬

雜記言大夫爲其父母兄弟之未爲大夫者之喪服如士服士爲其父母兄弟之爲大夫者之喪服如士